

Benny Sevinger ta pidi companianan di construccion pa

Cuminsa zeta mashinnan pasobra tin hopi trabou na caminda

Na inicio di construccion di Linear Park

MINISTERIO di Infraestructura tabata esun encarga pa hinca den otro e proyecto di Linear Park, cu realmente ta cuminsa na aeropuerto, pero e construccion a inicia banda di Neptali Henriquez Park ayera. E titular di Infraestructura, Benny Sevinger tabatin masha elogio pa e InfraTeam encabesa pa Rafi Kock, kendenan a pone e diseño definitivo pa cuminsa cu e transformacion di henter e area cu ta consisti di Linear Park.

Sevinger na e momento di e ceremonia di groundbreaking a señala cu hefe di Gabinete,

Prome Minister Mike Eman a dicidi cu un di e prioridatnan di nos pais mester ta e producto Aruba: e parti fisico y e otro ta nos turismo y nos economia. Ministerio di Infraestructura a tuma e reto cu Prome Minister a pone nan dilanti y durante un aña a bin ta trahando riba e plannan. Nan tur ta exponi den caya grandi pa publico en general mira. E plannan aki hinca den un Masterplan ta duna un concepto di con Aruba lo ta aki 10 pa 20 aña. E Masterplan ta inclui e isla completo. Gobierno lo bay haci lo maximo pa cumpli cu tur loke tin riba papel. Pero a sigura cu ta trata di proyec-

tonan di largo plaso.

E mandatario a bisa cu no ta trata aki solamente di cambio di e producto turistico pero tambe e parti pa nos propio hendenan, manera renobacion di scol y barionan.

“E ta bay ta un aña hopi exitoso pa Aruba. Cambionan grandi na caminda, aña exitoso pa mundo di construccion. Mi lo bisa e companianan di construccion cuminsa prepara, zeta e mashinnan ya cu nos ta bay duna Aruba un bista nobo. ...,” e mandatario a bisa. Y a agrega cu ta tur minister ta envolvi pa Aruba haya proyectonan di calidad.

